

摘藻堂四庫全書薈要

集部

欽定四庫全書薈要

集部

元詩選初集卷四十八

詳校官候選知縣臣吳甸華



欽定四庫全書薈要卷二萬四百八

集部

元詩選初集卷四十八 長洲 顧嗣立 編

岑安卿栲栳山人集

安卿字靜能餘姚人自號栲栳山人以所居近栲栳峰也與李著作季和危學士太樸相善嘗作三哀詩弔宋遺民之在里中者寄託深遠有俯仰今昔之思焉岑氏昆季多以科名顯者而靜能獨淪落不偶其簡王子英詩云平生耕稼心媿此老病

軀又云老成媿苟得童穉羞無官又曾資敬菴詩
云我窮不出門頗覺天地窄何其坎壈抑鬱之甚
也兵火之餘典籍散佚而今日尚知有靜能者豈
非顯晦亦各有數邪

古意四首

亭亭千歲松起自一寸植苟無斤斧患壽可比金石青
青園中草一雨迴故色清霜忽飄零彫悴在頃刻

寶刀不斷水綫溜可穿石君看城門軌要非兩馬力為

學不苦心虛談政何益偉哉大禹功猶思寸陰惜
濬冲執牙算武子蓄金埒積鏹不能施名穢身亦滅富
貴何足云道義自可悅偃蹇彭澤腰不為五斗折
江河東入海天漢恒西流感此不息機宴安匪良謀農
夫務耘植為學與義求青春厭老大還可回施不

百鴈圖

離離鴻鴈羣渺渺水雲國白雪剡川藤玄香牧溪迹形
真具生意彷彿二百翼四海兄弟情於茲見敘秩前鳴

後如應高下低復逆隨陽足稻梁直夜防機弋水寒蘆
葉黃霜清葦花白羣遊得所止一氣同悅懌哀哉淮南
謠布粟歌斗尺東阿賦豆其才高終擯斥觀圖適念此
翻為古人戚今人猶古人毋為後人惜

食新筍

黃蘗甕瓦已竭枯脯筐亦空老芥長芒刺食久咽為痛山
雨拆竹胎未入春盤供畦丁適踵門致我親戚送脫綳
錦紋散切玉霜刀弄新香歆湯鼎饒涎迸齒縫未倩搜

詩腸已破食肉夢參禪誠滑稽煮簞宜笑閨贊寧譜亦
佳涪翁句堪誦僻居東海偏斯味時一中山僧應厭餐
飽食聽春哢

盆蘭

猗猗紫蘭花素秉巖穴趣移栽碧盆中似為香所誤吐
舌終不言畏此塵垢汙豈無高節士幽深共情素俛首
若有思清風颭庭戶

夢中作

積雨稍開霽晴川櫂孤舟雙目豁陰翳四望餘雲收輕
風生衣袂灑灑舒煩憂橋橫落日迴水與山俱流白鷗
洲渚涼黃鳥林塘幽十旬九陰雨茲晴信難求美景與
心會及莫猶遲留賓朋愜清賞晤語更獻酬歸途見明
月華顛風颭颭

送景融姪之剡

宴安人鴆毒我老嗟無聞知汝行有日送汝寧無言汝
父早即世汝子衣猶斑汝弟頗知學且識應門難別家

思自奮託蔭薇花垣王侯近下士接待禮尤寬人觀所
為主結交慎扳援期汝在遠大囑汝猶殷勤蛟龍蟄深
壑變化斯須間鵬鷃志霄漢奮迅凌風翰錢塘萃佳麗
比屋人煙寰寢食須自謹勿躡春風門酌此一杯酒我
心愈憂煩功名倘相遂寄我歸來篇

次茲息菴冬日海棠韻

盈盈宮錦仙厭彼繁華場當春不自獻婉婉懷無方託
根旃檀林金仙借恩光羣陰正凝沍特與回春陽拒霜

宜媿死江梅亦羞香翻令桃李顏應有趨時傷定惠一
笑姿未免隨春芳始信鶴林仙解逞非時妝

和李宰韻

春風吹繁花秋露淨孤月壯年嗜好新對此每傾悅年
來百念灰搔首惟短髮流光不我與苔生古人骨常懷
却世紛宴坐學龜息心乎茂叔蓮興乃子猷竹從渠鵬
去留不問馬得失李侯宦遊蹤來儗海上宅庭蘭茁春
芽笑語落霏雪詩文嘗我過老晦資啟發窮思獨善身

自獻殊未屑對酒還當歌
甘旨朝夕君心與我懷相
對交歎息

灌畦

灌畦起清晨汲水甘自勞
微露溼裳屐涼風吹鬢毛
緬懷漢陰丈東陵亦其曹
顧予何為者佚豫敢自驕
日午得偃息讀書志彌高
年饑見秔稻萬民免煎熬
寄跡天壤間於焉遂逍遙

送任正之旋里

君居東海國投轄思釣鰲持竿三十年歸來鬢蕭騷六
鰲不可得動盪空波濤跋涉山海間力費心徒勞惟餘
詩酒興不負平生豪竭來三山居燕坐樓閣高開窓納
新月展席延清飈此樂我所嗜爽氣生膚毛世人附炎
熱反為我輩嘲窮冬雨雪途竹輿替蘭橈歸隱五磊峰
俯視雙丸跳何當共登覽長嘯青雲霄

傷心行用李長吉韻

朔風動清吟孤月流寒素白髮因青燈紅妝泣秋雨羅

扇沿網蟲寶鑑青鸞舞白晝魍魎行山昏鬼無語

詠范氏池亭

虛亭巧結構有此觀魚境碧沼風生紋高林月留影花
竹列我前松杉瘦而穎山環翡翠屏水瑩琉璃井書生
東海來山水頗深省喜有鄭家湖詩文每相警

三哀詩

故厲先生

先生諱元吉字無咎號半邨
宋末舉進士第為烏程尉

厲公子先師侃侃國髦士文詞奮白屋名識動丹宸帝

鄉眷遇殊曲宴錫豐侈青衫何足云倏忽期顯仕云何
尉苔溪露泣秋萱死朔風撼南極黃屋繼隳圯歸棲從
山雲松柯蔭琴史揮淚新亭悲詩窮黍離旨雪霜轉侵
凌故里不可止漂泊海東西生計日彫靡莫年賦歸歎
幸遂首丘志遺經惜無傳嗣續但耘耔死別三十春恨
未致一慰何當馬鬣封秋菊薦寒水

故高先生

先生字師
魯里先儒

我憶總角初羣立侍師魯蒼然太古姿肩髮垂素縷慨

思英發時濟濟整風度承家二百禩衣冠踵餘武馳騁
文藻林馥落老無過轉盼五十春國祚倏非故荒涼東
海濱誰復嗟罄宴幸餘慈溪翁詩文接情素孫枝復萎
折宗祏凜無主斯文竟何辜不綴一綫緒嗟予三世交
念此轉增慕蕭蕭務樟風悲號惘難訴

故李先生

先生字天錫號
碧峰里先儒

吾鄉山水佳間世產英特邇來百年間接武媿寥寂蒼
蒼栲栳峰東西峙空碧先生擅斯名挺挺無媿色馳聲

翰墨場羣彥咸辟易五色日迷眼造物祕莫測餘年付
詩酒琴詩自朝夕晚交無功師妙語契金石談空眇生
死奚以貧賤戚青衫固不就縱就國步草淒涼文會基
孤兔穴遺甍我生恨後時不及風采識空餘書一編焚
香得繡繹

題太真春睡圖

東風吹香蕩晴晝長安宮殿花如繡海棠一夜拆輕紅
淑氣薰蒸困醇酎太真徙倚沈香亭宿醒未解春冥冥

眉峰斂翠翳秋水侍兒夾擁花娉婷玉牀膩滑芙蓉展
水沈煙裊金屏暖丹腮融潤珊瑚溫寶釵斜簪烏雲綰
上皇玉笛那敢吹地衣紅皺靴輕移傳令別殿罷歌管
流鶯不語游絲垂漁陽鼙鼓邊塵動臺閣無言卿士懜
婦人一睡四海昏主闇臣諛總如夢翠華西狩九廟隳
禍胎未翦三軍疑馬嵬之夢生死訣一時悔禍人心歸
驪山舉燧供歡笑犬戎蹴踏周原草丹青誰寫春睡圖
後世不須箴太寶

次韓明善題推蓬圖

青松陰陰間修竹六月翛然破炎溽梅花一味只宜冬
江上孤舟水邊屋筆端春信回孤根鮫綃淺抹玄霜痕
江南煙雨正愁絕一枝喚醒羅浮魂無聲詩生有聲畫
吟咏工夫見揮灑坡翁仙去二百春夢繞松風古亭下
茲花清致誰堪當孤山題品淵源長推蓬細認心淒涼
鼻端彷彿聞天香

題晴川圖

清溪粼粼生淺花
曉日倒射搖金沙
翩然雙鷺下危石
玉雪照影無纖瑕
溪邊小景入圖畫
青煙綠樹漁翁家
漁翁歸來歌未終
鷺鷥忽起蘆花風
回眸遙望不可極
但見白玉飛青空
昔年夜宿瀟湘浦
徹曉不眠聽急雨
解衣曳杖立沙頭
何似今朝得容與
長安馬寒泥沒腹
雪滿朝衣凍肩縮
試令援筆題此圖
長篇應賦歸來曲

二月二日大雪偶賦時寓州郭

東風吹寒春漠漠
海氣作暝天昏昏
空階夜落雪一尺

起看萬樹梨花雲詩翁撚鬚僵不死開窓強作飢猿蹲
欲呵凍筆寫清思甕中餘漉催頻溫山僧積財富畎畝
驅馳役事何紛紛木魚停撾磬聲絕但聽衙鼓趨公門
何如孤舟釣魚叟一蓑獨釣寒江濱

出門偶賦

老驥伏櫪風蕭蕭飢鷹側目看青霄驪龍抱珠海底臥
虎豹不噬羣狐嗥河邊老人倚牆坐六合茫茫彈丸大
平生賸讀古人書倒篋青錢無一箇側聞朝廷遺逸徵

集賢著作空盈庭紫微堂上日羊飯世祖山河如砥平
予觀近時詩人往往有以前代臺名為賦者輒
用效顰以消餘暇

章華臺

周網陵夷九鼎輕玉帛交錯朝蠻荆熊虔北睨志未已
積材壘土攬青冥姬姜麗質鄭衛音臺中燕樂森如林
汾沮遠略肘腋變乾溪一散愁人心荒山飢走歸無所
睡酣又失涓人股棘聞深閉魂魄飛申亥負尸埋淺土

章華臺上空子規
嘯殺游魂終不歸

姑蘇臺

吳王築土山為址
俯視水雲三百里
臺中歌舞萃華麗
金碧巒岉眩珠翠
江花泛泛浮鷗夷
會稽思霸甘卑辭
千金不買西子笑
一舫竟逐陶朱歸
丹砌草深麋鹿臥
淒淒棘露沾人衣
闔廬丘墓虎為衛
至今鐘磬聞餘悲
遊人不悟國傾亡
松間援筆題真娘

朝陽臺

巫峰十二青參差石形儼現仙娥姿蒼藤翠木怯淒冷
精誠夜感襄王思仙衣縹緲仙裙溼雲影飄飄雨聲急
陽臺朝暮不勝情高唐想像愁無極夢中寄遇事杳冥
公子雕辭亦胸臆荒涼古廟屹江干臺空不見行雲跡
遊人悵望尚徘徊古碑寂寂荒莓苔

黃金臺

雕牆峻宇無不亡薊城築宮國乃昌屈身延士禮優異
四方英俊如雲翔郭生馬喻真良策亟拜樂卿為上客

兵行旬日入臨淄秦楚諸君咸辟易夙心已雪先王恥
七十齊城祇餘二君王仙去主帥逃歎息後人非繼志
魏臺悲慘朔風號不知騎劫何時招

歌風臺

嬴秦北築聲萬里芒碭無人識雲氣鴻門斗碎驪山焚
漢楚殘民半為鬼重瞳失道身首分沛公酒敘還鄉恩
風雲飛動白日永歌聲激烈悲勲親四方備禦思虎士
進取守成良不易長陵宗奉四百春歌臺遺築今荆杞

壯哉一曲大風歌千古英雄盡懷愧

戲馬臺

彭城負險河為障南屹宗臺勢雄壯重瞳奮跡入秦回
諸侯攬轡皆東向酒酣蹴馬升崔嵬髮翻鬣振雲煙開
倚鞭四顧示無敵指揮貔虎心雄哉黃金間行亞父去
帳下茫然失謀主楚歌聲合潰重圍昔日名騅空故步
千年積恨氣未消繞臺泗水撞飛濤

望思臺

金莖擎露空崔嵬湖臺築恨心猶哀剖桐殞土事曖昧
禍機元自長生來壽踰大耋世已稀趙國憐人心險巇
盜兵誅佞兩非是屈髡督戰猶驚疑銜冤竟殞鳩泉里
壺關三老言非遲向無少卿護病已上林僵柳何緣起
空餘老淚滴紋甃斑斑相間苔花紫

銅雀臺

漢室分崩成鼎峙銅雀輦飛鄴宮起碧甃漾日覆紋鴛
蕙帳凝香集餘妓我觀羽始既驕逸後裔焉知惕奢侈

洛陽宮闕凌青霄公卿負土何焦勞玉音親責役夫緩
瞬息身首橫霜刀荒遊日恣典午肆西陵空掩欺孤智
至今硯墨抱遺羞千古姦雄穢青史

鳳凰臺

萬里長江東入海千年高臺今尚在當時誰道鳳凰來
覽德何人足相待鳳聲悠悠梧葉空謫仙文采流長虹
跨鯨一去不復返後人欲語羞雷同海上三山渺何許
羣仙騎鳳隔風雨登臨空詠謫仙詩白鷺斜飛過秋浦

八月上旬出遊晚歸

栲峰老人頭雪白竹扇如箕障炎赫徐行阡陌稻花間
稚子歌呼手高拍西風吹我衣巾輕鷺鷥飛起鸛鵒鳴
西山一餉挂龍雨薄莫歸來新月明

題張彥明所藏翦紙惜花春起早圖

流蘇帳卷春寒輕紗窻弄碧天微明軟紅嬌紫怯朝露
美人推枕心為驚鬢雲未綰香奩開侍兒側立肩嬰孩
黃鸝飛動花影亂停梳睨猶相猜誰將妙意寄工巧

溪藤雪瑩金刀小丹青退舍松煤枯翦出天真數分杪
筌熙傾軋空自誇惟競時人顏色好無聲有聲兩相副
此景此詩均壓倒司空見慣了無言應是禪心被花惱

美人行

錦雲罕地春風軟彩鸞影展烏雲綰繡茸慵理怯餘寒
寶鳬煙斷花陰轉露晞香逕苔蘚肥鳳鞵溼翠行遲遲
憑闌無語何所思默看雙蝶花間飛

防盜夜行

翠蘿滴露絡緯鳴熠燿照影秋水清輕雲度白河漢明
月挂半壁生東溟幽人不寐起夜行鐵搗攫地鏗有聲
綠林豪客慎勿驚白晝大盜猶縱橫

求葉仲輿寫墨竹扇面

此君一日不可無子猷篤愛心歡愉延平官舍斬伐餘
稽山倦客心煩紆先生拋官南海來胸中丘壑爭崔嵬
筆端造化奪天巧籜龍一夜驚春雷素絹團團翦秋月
願染玄霜寫幽絕蕭然便覺風雨生頃刻清寒屏炎熱

昔時與可稱絕倫
息齋近世尤逼真
我持此扇出門去
要使襪材咸萃君

逢秋

高梧脫葉金井寒
壁月夜挂珠闌干
銀河萬里浸虛白
凌風欲訪乘槎仙
金壺箭水聲第一
畫角梅花聽悽惻
三山樓閣碧海涼
老鶴不眠清露滴

謝李仲容見贈

海風立水天空濛
瘴雲晝掩蓬萊宮
仙人跨鶴天姥東

歸來樓閣昏無蹤九仙山高玉為戶廣寒夜訪乘鸞女
挂香滴露夢不成看徹霓裳羽衣舞宮袍舞錦花翩翩
詩成毛骨生清寒飛章贈我歸剡川推蓬月在梅花邊

次王敬助見寄韻三首

開元古名刹獨客思淒然不佩六國印元無二項田吾
猶甘自守人政不須憐堪笑陶朱子西施共上船
琴書曾遠訪訪我海東濱對酒不成醉看花惟惜春青
燈書有味白眼世無人儘有耕桑趣翛然一幸民

祕圖留滯日鄉思已淒淒黃卷挑燈閱紅妝掩鏡曉交
新情僂僂感舊恨低迷語及深知處應憐獨鶴棲

八月十九日宿慈水車輪橋野人家夜聞犬吠
有一人立門首忽問曰雞鳴否詰之乃入縣膺
役者蓋卜夜之蚤晚恐違官事也感而枕上有
作

官道月朧朧微雲弄薄晴居人聞犬吠行客問雞鳴王
者化無外公家事有程民心雖謹畏何日是昇平

九月三日晚與鄭元秉對坐至日暮小雨後歸
宿偶成

歸人歸未得天際復生陰
小雨溼官道清砧傷客心
蕭肥蘭蕙瘦雀語鳳鸞瘡
坐對滎陽老空懷正始音

夏夜偶成

雨下山雲黑雨收山月明
涼風蚊蚋散活水蚓蛙鳴
露頂中庭坐披衣曲砌行
遙憐荷戈士觸熱入占城

沙縣小樓

半載客延平沙陽夢愈驚蛩鳴深巷靜月昃半樓明故
國三千里歸途一月程西風在庭樹締綌不勝情

寄易禮弟

越客半年住閩溪千里流山高不礙夢日莫易為愁兄
弟終相憶鄉閭非所憂何當先壘側同理釣魚舟

簡王東臯

劍光飛射斗牛寒應笑如今缺尚彈萬國梯航朝帝闕
百年禮樂付儒冠黃金用盡無顏色白髮交深見肺肝

重念蒲輪東魯客莫年名動漢朝端

重峰寺祈雨後簡李元善

塵尾高揮演大乘火雲不散愈峻增謾同三島吟詩客

閒訪重峰醉酒僧

僧謂竺西

翠竹陰移涼夢遠碧蓮香散莫

雲凝歸途未即天瓢注猶有長風解鬱蒸

洪希文續軒渠集

希文字汝質莆田人其父德章號吾圃宋貢士為
興化教諭希文其次子也德章與坐萬山中朝晡
盃飯燒芋咬菜相倡和無愠色德章有集曰軒渠
希文因自號續軒渠集明三山徐爌云希文丁酉
自壽詩年過絳縣垂垂老蓋已七十餘也至正乙
巳又有耄耄之句以生年考之當生于前至元庚
辰享壽八十有六實與元代相終始郡人林以順

謂其詩得意處皆自肺腑流出至于造語鍊字之法頗費工夫易隱卓器之曰吾圃試校游洋翁季枕邊談詩以僧敲未敢一言定烏過曾安幾字來之句授之夜卧三鼓聞書聲云有子定知吾事足貧家頗覺此聲佳志喜云甫譏失學難為比琰見趨庭喜可知所謂是父是子自成一家機軸者也

閏八月郡庠小集呈高一初廣文并會間諸老今年中秋月不見白玉盤天公莫省事留待閏月看解后

至此夕萬里雲漫漫孀娥為誰怨不肖駢素鸞尊酒興不
盡聊借今日歡庭前桂花開更覺酒量寬隨寓皆可樂何
必遊廣寒相從君子堂餘慶由衣冠當時金谷園徒起長
恨端丁寧坐中客慎勿嫌冷官東籬菊漸黃尚可供遊觀
聞清漳近信

龍逃海水熱簡書亦足畏蹇蹇皆王臣或有獨勞悴有司
輸軍儲風觚往供餽朔風卷櫓櫓願散旄頭豸蒼生豈不
困督責太煩碎側聞良家子坑塹紛填棄坐視若不聞勇

壯失勳勳母負朝廷恩泥沙傾廩餼獨振迫河隍踟躕
果何遲候鼓日夜鳴擊鮮交勞吏燕寢尚宵衣健兒獨
辜懺聖祖仁立國垂統千萬祀方隅有竊發敢不趨父
事宜推子弟恩疾痛肝膈臂奈何當此時反若秦越視
太平日已久兇惡無噍類富庶非不多休頑靡不至何
當穢濁清凱奏歡童穉使我閩閩翁翹首瞻佳氣

送林景惠和興化教諭三首

華星何歷歷際此時休明嚮來章甫冠太平皆長纓某

也收科第濯濯邦國楨某也受書禮擬作觀光行儂亦
清浪兒歲月徒崢嶸壽陵欲進步蹇澀路不平豈不念
憔悴借譽無公卿逝將買一廬空谷為畊氓歌聲出金
石聊以陶吾情

朝遊夾漈山漈水何漣漪莫登石門山山石亦差差水石
太古色山人去何之君今遊此山為予訪顏基多謝吹藜
翁七畧今有歸矧茲十室邑文獻猶庶幾君子樂育才新
樞理不遺白袍久延佇雪立風披披煦之以惠風暢若春

陽熙前程雖云邁來者猶可期

夾深鄭夾深所居
石門陳聘君所居

昔我侍吾翁設教山水鄉
樞衣琴冊暇問禮俎豆行在
寢皆淵騫籍湜走以僵
五年飽藜苒麤糲甘我腸
別我事瓦解改邑從新岡
綦荆暗丹腹歸然魯靈光
回首三十年追憶成荒唐
獨有溪水聲絃誦猶琅琅

貧甚食草具作

赤覓赤如脂苦賞甘如飴
盤登惡草具味等薇與芝
賢哲逝已遠昧昧余所思
伊人既忘世此外皆若遺
梁肉

世豈乏飽死黃牒兒千金渥注種歲晚鳴枯萁尚餘耽
書癖不與塵土緇此樂豈在外簞瓢猶山堆蹇劣安所
性所恨生清時揚子法言修身或問回之簞瓢懼如之何曰明明在上百官牛羊亦山堆也閭
閭在土簞瓢梓茹亦山堆也何其懼

癸酉閏三月十六日仙邑館所兒子琦入夢悵
然不憚後八日自解

人生壽幾何過若飛鳥速詎云垂老日欠汝淚一掬棄
來將一期觸感常在目夜夢或見之恍若牛舐犢回頭

語鍾琰此子豈不蓄得非愛惑聰戲我如蕉鹿吾年在
桑榆期汝猶絲竹胡為舍我逝世事如水覆嗟哉六如
身悟道講已熟莫將恩愛刀更刻風中燭

枕簟入林僻

朱夏困蒸鬱城市多淫哇閒招嘯雲侶來食山中霞山
中有何好泉石端可嘉清溜接筧筒火種憐畱畬枯松
偃澗壑赤日流丹砂茂林無珍禽智井空謹蛙桃笙寄
億邁菊枕便昏花煩襟頓消釋密蔭爭交加羲皇有神

交遽廬等仙家久坐令人健微吟到日斜浮雲滄海狗
歧路常山蛇祥飈偶披拂哀音餘摻搗山深民多醇鄰
酒亦易賒去去下巖扃歸途暝棲鴉

嘗新橄欖

橄欖如佳士外圓內實剛為味苦且澀其氣清以芳侑
酒解酒毒投茶助茶香得鹽即回味消食尤奇方宮商
舌底發星宿胸中藏雖云白露降氣味更老蒼山林假
歲月顏色饒風霜以茲調衆口誰敢輕頡頏作此橄欖

詩遠繼葑菲章大器當晚成斯言君勿忘

擬古呈賀郡公

喬林巢獨鶴自愛經幾秋戛然伸其喙衆鳥噤不啾饑
啄玉山禾渴飲清渭流豈不念饑渴芳潔慎所求翹首
仰雲衢亦有健翼遊雲衢非吾事所性林泉幽林泉有
何樂雞鶩相與儔賊糧固其性耿介難自謀雞肥鶴日
瘠謾自高一頭况又去其半半載不見詵衆禽詭然笑
餓死子爾羞餓死則猶閒未死將誰尤

揚子學行頻頻
之黨甚于鷄斯

亦賊夫糧
食而已

續聶夷中傷田家

貿貿丘麥秀
蛭蛭吳蠶生
微行執懿筐
亦既受厥明
上馬給王賦
下馬紆官征
豈為饑寒念
所念瘡痍平
哀哀生理窄
了了無餘贏
惻怛夷中詩
萬古田舍情

讀凍水司馬公和金陵王半山烘蟲

文人語多工
微纒自繩糾
啗蟲至么麼
謂可懸戶牖
胡為大車軸
貫心竟何有
禦寇近道翁
縱此瀾翻口
景略

疎救時袖此無用手挂名青史中遺笑傳不朽後世為
美談姓字記誰某二公廊廟資力可扶宇宙如何唱酬
間爬剔便絮垢仁義蝨其官有益國家不三歎商君書
掩卷重搔首

初冬述懷十四韻戲簡周介福陳仲敷二先生
顙頊方用事威節何辛酸百卉無遺秀千林變成丹陰
風日淒厲梯此長恨端妖豔不可極予生尚多艱寒爐
守煤燼枯條滿青山乾釜憶澆潯甘井生波瀾新霜骨

髓痛永夜衾裯單病馬聞飢嘶露猿聽號寒起坐復痒
瘵有酒難為歡愁如匪澣衣何時思一浣棄置兒女悲
壯志生羽翰况當警寇盜戒備嚴鄉闕願請受長纓殄
彼為民殘天平矜其能夕死意所安

題聖墩妃宮湄洲嶼

我昔纜舟謁江干曾覲帝子瓊華顏雲濤激射雷電洶
殿閣碑兀魚龍間此洲仙島誰所構面勢軒豁規層瀾
壺山峙秀倒影入乾坤擺脫呈倪端粉牆丹桂輝掩映

華表聳突過飛巒湘君小水幻靈骨虞帝跡遠何由攀
銀樓玉閣足官府忠孝許入巫咸班帝憐遐陬雜鯨鰐
柄授水府司人寰五雲殿邃嚴侍衛仙衣發駕朝天關
危檣出火海浪破神鬼役使忘險艱靈旗毵毫廣樂振
長風萬里翔孔鸞平洲遠嶼天所劃古廟不獨誇黃灣
至人何心戀桑梓如水在地行曲盤升階再拜薦脯藻
不以菲薄羞儒酸日談書史得少暇石橋潛度凭雕闌
詩成不覺肝膽醒松檜蒼蒼鳴玦環騎鯨散髮出長嘯

追逐縹渺乘風還

書夏政齋欠伸背面美人圖

鬢髻高髻宮樣妝天風飄飄雲錦裳心華未肯開桃李
縱有粉黛難輝光怪渠何事長背面百歲風花能幾見
雲收雨散易傷神齊魯姬姜顏色變當時畫史筆亦神
風流醞藉作欠伸丹青意在毫素外縱使貌得非天人
可憐前代汗青史薄命佳人類如此幾多寵極愛歇時
失意長門暗宮裏老人耳冷不欲聞世上兒子徒續紛

摩挲喜見法眼淨為君起炷鑪中熏

飯牛歌

牛吒吒蹠趵趵枯萁嚙盡芳草綠自晡薄夜不滿腹
擷菜作糜豆作粥飼飢飲渴兩已足脫紉解銜就茅屋不
愁飢腸雷轆轤風簷獨抱牛衣宿丁男長大牛有犢明
年添種南山曲

煮土茶歌

論茶自古稱壑源品水無出中泠泉莆中苦茶出土產

鄉味自汲井水煎器新火活清味永且從平地休登仙
王侯第宅鬪絕品揣分不到山翁前臨風一啜心自省
此意莫與他人傳

聽琴歌

疎簾曲檻蘋風涼細罽美人藕絲裳神閒意定丰度遠
玉指纖纖彈履霜喬林鶯轉日卓午幽澗泉鳴夜未央
孤鸞別鶴生暗恨毋以冰炭置我腸

癸酉六月十四日辭痛不自聊戲作短句

卿不見將軍力挽十石弓勇沒矢苦寒氣隆又不見翰
林醉揮數寸管勅賜宮袍天色晚古人文武具全材但
見伎倆忘形骸君看朱亥推晉鄙袖千鈞鐵何偉哉詩
翁不復作是夢磨墨研丹足吾用晴窗卷手不停披塗
竄典謨箋雅頌天公何事不見憐坐失肩背生憂煎頑
然自覺不屬體縱有杯杓令誰傳諸君莫笑老無力他
日為郎能執戟

春寒無炭

古人坐客寒無氈我今為客寒無煙東風兼領玄冥權
今年春寒過去年梅子含酸實未堅薺麥雖茂胎未全
海棠羞澀開紫絲山南山北無杜鵑詩翁縮頸聳兩肩
玄龜守殼凍不前吟成呵硯冰尚堅毛穎蹇澀非張顛
喚起石鼎句再聯倚牆道士鼻息喧此時得酒真解仙
博取一醉真可憐君不見雲安斗水直萬錢杜陵雖老
性命懸畫灰對雪思悄然忍寒披絮夜不眠牛頭何日
雙錦纏

曉行途中書事

冥發昧所適東西覺惘然門敲邨店酒鐘落客津船猿
叫荒山月雞號墟里煙回思在家日日晏尚高眠

讀杜拾遺老瓦盆戲作

此翁坦率性長享甕頭春觴客終頽玉傾人嬾注銀干
戈塵世淚風月草堂身賴爾有蘇鄭情親不厭貧

杜詩
早歲

與蘇鄭痛
飲情相親

獨立

雨後衡門立郊垌晚氣清鴨頭流水淨魚尾斷霞頰竝
舍開新釀平疇餉晚耕微吟扶柳栗信步自閒行

少睡

少睡多宵坐占星看碧虛病根常檢點客氣久消除清
有焚香癖臞因服藥疎眼前書未讀肘後看方書

郊行

天亦自多事一春勞應酬哺雛衝雨燕喚婦出林鳩有
累俱闕抱無生始斷愁忽逢林下士羞默但低頭

壽峯翫月

素娥准敕六丁擎下照塵寰
伴水晶河漢無雲天
萬里溪山不夜月
三更蓬萊弱水何曾隔
玉宇瓊樓無此明
今夜壽峰峰絕頂
與君端坐細推評

守歲

掃退陰凝萬瓦霜
儒家守歲似如常
沈香已帶寅前氣
臘酒初聞子後香
凍雪驚春先爆竹
祥雲夾日上扶桑
熙熙民物皆生意
天建皇疇福萬方

清明游陳氏園亭

村村花柳暗晴川
百五時光不暫延
綠暗園林尚佳節
清明亭館自新煙
喜逢熟食傳遺老
怕著新衣學少年
惆悵東園花侶雪
人生底處勝樽前

春晚同數客游靈巖廣化寺書所見

塔外青山匝四圍
澗邊流水繞松扉
白雲一塢僧長住
紅杏數枝春漸稀
雨足人牛耕曠野
山深鳥雀哢晴暉
長廊響屨皆明禁
口自忘言心自非

明皇太真避暑按樂圖

已剖冰盆金粟瓜旋調雪水試涼茶
宮娃未解君恩暖尚引青罌汲井花

幽居

柴門掩斷徑生苔坐閱東君幾往回
看盡牀書無客到殘花風送過牆來

袁士元書林外集

士元字彥章慶元鄞縣人德祐忠臣鏞之孫性至孝父患背疽吮之立愈年幾四十未嘗求仕御史與林以茂才薦授縣學教諭調鄮山書院山長危叅政太樸薦為平江路學教授擢翰林國史院檢閱官不赴築城西別墅種菊數百本自號菊邨學者所著書林外集七卷太樸為之序稱其詩清麗可喜往往自放於山顛水涯之間與山僧逸人相

與為倡酬何其興致之高遠也子珙孫忠徹皆以
相術知名珙別號柳莊嘗識明成祖於潛邸者也

送張路教

北風何栗烈木落清霜飛天高鄴水寒客子話別離三載
縣博士官冷苦自縻青鐙坐深夜竹屋風淒淒齊人報及
瓜喜色浮雙眉翩然告歸去浩氣不可羈丈夫太阿劍斷
玉如切泥綠塵凝古匣宣終韜光輝縣邑聊小試才大當
優為天空鴈影寒日暮煙光微行行各自勵勿歎功名遲

和呂嗇齋三教飲韻

我昔湖上游，悵望湖中嶼。相去咫尺間，一水頗修阻。地偏禽鳥樂，春靜花自吐。欲往興復闌，佳期空側佇。

用呂嗇齋和鄭以文望霞嶼寺韻

倚杖立湖曲，夕陽明遠嶼。隔水見招提，游興浩難阻。輕舟蕩輕波，魚吹浪花吐。四望山意佳，推篷吟復佇。

題慈隱菴

高僧以慈隱，遠在石橋西。地接支郎寺，門臨孝子溪。松

風斜落徑竹影亂侵畦不見中巖老荒邨獨杖藜

題蘭水仙墨竹

上林春又老在野抱幽貞泣露丹心重凌波玉步輕孤
山初雪霽三徑午風清志操渾相似何妨共結盟

和元善郎中

水館春將晚凭闌靜自吟蜂粘飛絮起魚噉落花沉濟
世身無術鄰邦賊又侵臨風搔白首空負讀書心

和松石齋寒食客中

王孫歸未得芳草接平蕪邊報不時有鄉書絕迹無馬
憐橋外洗猿憶洞中呼客邸又寒食故鄉天一隅

送張月卿

野水秋風起孤邨落日清寸心江百折雙鬢雪千莖邨
迴羣鳥合天高獨鴈鳴題詩送歸客遠別不勝情

簡樓伯容

雨霽江城晚涼生六月秋鳥栖煙樹暝螢出水邨幽殘
笛鳴鄰巷嚴更起郡樓故人何處在新月柳梢頭

北門團練貝子美

四野尚風塵民生日轉貧誰知持戟士亦有讀書人過
客多憐我深衣不稱身晚來歸侍母莫為點行頻

送信孚中住龍翔集慶寺

梵王宮闕皆名山金陵佳麗非塵寰龍蟠鳳翥氣磅礴
樓臺縹緲煙霞間上人昔年住東海兩袖天香雲靄靄
磐陀石上迎朝暾潮音洞口瞻神采尋幽近復游天童
萬松徑裏支吟筇寒泉迸石影清淺高崖挂月光玲瓏

祗今飛錫凌雲表，妙高臺上天花繞。
秋風江漢動餘思，何日留衣一傾倒。

和劉德彛海棠

主人愛花如愛珠，春風庭院如畫圖。
褰衣曲徑步花影，翩跹夜月飛長裾。
海棠睡起春正美，花貌參差玉人似。
主人吟賞夜不眠，直欲題詩壓蘇子。

米貴

去年避寇荒農天，今年捕寇無客船。
江頭白米纔一斗，

索我三百青銅錢

喜雨三十韻

并序

重光大荒落之歲自春而夏不雨兼月東作幾廢
郡幕有為民憂者控辭力請普齋呂鍊師設壇致
禱不三日甘澤霈然官吏交慶實五月一日也因
以三十韻紀其事

仙術由來能致雨誠心所感可回天公家既盡祈禳禮
洞府宜分造化權明處浙東雖大郡鄞居海右乏深淵

每罹曠旱憂為甚况歷饑荒恐復然春後一犁方欲動
田無勺水絕堪憐木龍謾吼江頭月秧馬猶沉屋角煙
病暍征夫心正折望霓農叟眼將穿此時奚啻千金直
民命危如一綫懸郡幕有官偏惻隱旻天無路莫黃緣
遘才幾度詢諸老薦口咸推汝獨賢閉戶固辭徒至再
下車力請寢勤奉一箋丹悃求嘉應即喜玄機妙斡旋
衆覽但知惟兀兀神飛誰識自翩翩心香虎闥初無阻
膏澤龍宮詎敢專蜥蜴捧符來洞口神祇森仗立雲顛

頓驚百辟爭趨事始覺羣巫乃備員
電逐劍光纔動處雷轟印令未施前
天瓢乍滴終傾倒月額初開漸復連
別院始看庭積雷前邨已見水行田
秧針被潤青而秀菜甲分甘綠且鮮
壤畝田翁驚破塊井胥竈婢喜添泉
乾禽澡羽鳴溪樹涸鮒揚鱗躍澗川
竚見桑麻還鬱鬱行吟花竹正娟娟
槐邊市有新鳴屐柳下塘無久繫船
已掃螟氛消毒暑漸清燕寢飽高眠
童謠爭唱昇平曲祖帳高題志喜篇
試衍葛玄應斂衽論功束皙可隨肩

世人獨歎重玄秘真宰多憐一念虔往歲作霖頻復見
鉅公題石久曾鐫誰知白首當今日猶為蒼生作有年
題城西書舍次韻

自笑茅檐多野意水邊栽柳翠成堆鶴因無恙老猶健
燕若有情貧亦來曲徑斜穿花影入小池低傍竹陰開
故人有意能相訪細啜茶甌當酒杯

題西山傳菴

新築茅菴僅數楹翼然輪奐出林坳溪頭春水繞籬白

門外曉山當戶青
小妓折花來供佛
老樵弛擔坐聽經
憑誰作賦能招隱
我欲依巖結草亭

送李叔易郎中之閩

茅簷僅隔幾漁罾
五載無由識李膺
牛渚月明船久泊
龍門春暖客初登
三山果熟催征騎
四月萸香憶舊朋
奈爾相逢又相別
河梁攜手復何能

送柴養吾先生游四明山

春游清興已闌珊
送子扁舟獨上灘
諸老謾期花下醉

好山應待畫中看
曉行嶂霧侵衣潤
夜漱溪泉透齒寒
林壑夏涼宜避暑
主人瓜熟許分餐

送沙布迪音平章孫秉彝

秉彝又名長壽者寓項巷前監生江浙宣使軍

功舉鄞邑監有母七十航海北歸丁亥五月十二日

公孫年少尚輕肥
回首誰知世事非
萬里荒煙迷故道
半江斜日照漁磯
帆開雨後南風正
家插天邊北斗歸
我亦乘桴浮海去
沙頭白鳥故飛飛

按丁亥歲為至正七年是冬沿江兵起八年遂有方

國珍之亂參章又有和王從素感時一詩可見其素志矣其詩云十載中原未解兵生民逃難散如萍移家楚峽嫌

山淺飲馬淮河厭水腥壯士守邊頭盡白老夫憂
國淚交零何時四海還歸一使我王心喜再寧

和江亭納涼

晚來避暑水邊亭短髮蕭蕭涼思清笑摘藕花嬌欲語
細看鷗鳥淡忘情月依檐轉窺人近風逐潮來拂面輕
適意不知身坐久漁邨漸見一燈明

和嵯縣梁公輔夏夜泛東湖

短棹乘風湖上游湖光一覽湛於秋小橋夜靜人橫笛
古渡月明僧喚舟鴛浦藕花初過雨漁家燈影半臨流

酒闌興盡歸來後依舊青山繞客樓

和松石舍人秋夜不寐

拋書欲卧意遲遲坐聽秋聲思慘悽螢火獨飛侵慢小
星河斜落壓城低牙籌歷歷隨更轉磷鬼啾啾隔水啼
更為挑燈移近榻與僧相對話曹溪

過高錢探子章及禪寂詠心源不值

載酒東湖歲已闌擬同朋舊醉開顏長鬚吟客近入郭
多病老禪纔出山霞嶼寺連寒水遠月波樓鏤暮雲間

停舟自對梅花酌雪壓孤篷夜未還

鄞之青山乃衣冠文物之地潛齋劉公實居是
焉僕往歲與象山樊公天民長燈卓公宜之皆
嘗讀書於斯暇日潛齋與吾二三子徜徉山水
間以詩酒自娛如此者十有餘年後僕回里諸
公亦漸散處近云此地為鬱攸所廢良可歎也
茲聞潛齋宅甬東去僕書舍不遠因述舊懷寄
之

彈鋏歸來感舊游
天涯何處話離愁
青山有分長為客
白髮無情忽上頭
冠蓋盡隨雲影散
樓臺近逐電光收
聞君近卜江邊宅
仍許閒情共白鷗

借韻咏城南書舍呈倚雲樓公

曉倚吟窗曙色開
江頭野趣亦佳哉
平蕪宿鳥衝煙起
遠浦春帆帶雨來
閒種石田供鶴料
旋開園沼買魚栽
讀書自古城南好
擇地多慚吏部才

寄小溪周復禮

書閣閒吟祇自凭短簾風峭酒微醒向陽溪岸梅先白
得雨山田麥漸青老衲倚筇林下寺野翁待渡水邊亭
寄言歸隱濂溪客新歲還來了舊經

九日後有感

滿城風雨重陽後客況淒然歎薄游白酒黃花非舊日
烏巾素髮是今秋時艱開口難成笑事往驚心轉覺愁
無復山東有兄弟鴈聲莫遣過南樓

謝樊天民先生朱以仁先生謝德清見訪并述

懷

詩思蹉跎四十餘未窮經業鬢先疎歸來自媿窮途客
枉顧多勞長者車荷葉池塘疎雨歇榴花庭院晚晴初
吟懷浩蕩憑誰遣幾向東家借蹇驢

遊東湖醉中歌

青山偃蹇不可呼我行青山如畫圖蕩舟春波竝山去
青山盡處橫陂湖周湖一百二十里湖波極處山孤起
下臨滄海上青天南有浮屠抱山址事幽興集天風來

乘風便欲歸蓬萊憂長未釋天地隘眼闊稍覺心顏開

酒酣重踏孤舟發此興平生浩難遏橫山西去復清溝

屠蘇巧構林巖幽園翁翦花春在手蟠迴石磴窮雕鏤

興盡歸來月猶在盤礴解裝春變變呼童置酒復徘徊

明月清風如有待臨水軒窗次第開玉山自倒非人推

吁嗟勞生快意少故園茅屋今蒼苔明朝陰晴未可必

攜手重遊定何日借我仙人九節筇直欲拄上太白峰

頭五

題寒江獨釣圖

堪笑江湖幾釣徒
朝來相喚暮相呼
祇今風雪蒙頭處
回首煙波一箇無

題水西軒和府推何德孚韻

積雨荒池水欲平
軒窗長夏有餘清
吟餘一枕滄浪夢
卧聽風荷受雨聲

上陳達卿架閣

金猊香透小窗紗
蓮幕歸來日未斜
掩却竹扉清晝靜

呼童汲水更澆花

雨中遣懷

雲壓低檐雨未收
隔林猶聽叫鉤輈
詩翁慣作天涯客
滴碎空階不解愁

夏日山居

疎簾拂拂颺南薰
睡起茶春隔岸聞
蠶老已收松上雪
麥黃初漲隴頭雲

甲子七月廿二日忽坐後聞彈鶴

鶴立高枝暫爾安無情蕩子彈金丸老來還有冲霄志
莫作投林倦翮看

暮雨

山北寒雲去復還黃昏院落雨珊珊數聲捎入芭蕉上
不道愁人獨倚闌

孤梅

玉骨冰肌迥不羣羅浮山下幾黃昏應時桃李知誰在
月冷霜清欲斷魂

水仙

醉闌月落金杯側
舞倦風翻翠袖長
相對了無塵俗態
麻姑曾約過潯陽

張端溝南漫存藁

端字希尹江陰人博學好修以薦授紹興路和靖
書院山長歷官海鹽州判官江浙行樞密院都事
人稱為溝南先生所著有溝南漫存藁子宣洪武
初與修元史擢翰林編修

和傳可除夕

歷盡年俱往寒多火未銷為憐無去日翻恨有來朝世
路看何隘家山望更遙雙娥銓影裏翦綵待元宵

和秦仲對雨

雨多檐溜響潺潺矮屋深窗面面關秉燭襟期憐晝短
看花心緒恨晴慳銀塘水滿鷗先下翠幙春寒燕未還
執戟揚雄今白髮久無夢到紫宸班

次韻酬馬國瑞都司二首

老去人間百不宜晷長何補歲陰移絕憐識字翻投閣
肯為窺園廢下帷一樹梨雲迷醉眼十年春草誤歸期
倚闌片月能知我故故穿雲照影遲

寂歷東風草盡生
綠陰啼鳥過清明
江山望眼他鄉美
雨露懷思我輩情
身老不堪春去速
名虛底用晚來成
才難自古人興歎
一將賢於萬里城

穹窿寺次倪雲林韻

穹窿佛寺買臣居
臺殿猶存漢代餘
山勢盤陀真是畫
泉流宛委遂成書
從渠說夢迷蕉鹿
著我眠雲聽粥魚
十頃薄田桑八百
南陽只合卧茅廬

城南游次秦仲韻

城南與君十日游柳條拂蓋花迷舟穹窿上方青未了
點綴時見雙飛鷗花深湖曲不月住直欲尋源過湖去
軍裝小妓起清歌爭看風流漢都護亭臺已荒廢鹿走
笑指吳王闕紛紛往事何足論冉冉流光暗中度

少年看花花在眼只今看花花隔霧故園樹樹開東風
油幕金鈴有誰護人言花落春與歸未省春歸在何處
縱令翦綵強留春不禁青天走烏兔古人秉燭良有以
行樂及時恐遲暮明朝滿地綠陰多青草池塘吹蛙怒

我歌君飲君鬢黑我衰強歡須酒力顛秦蹶劉且勿言
翻雲覆雨何由測人生所貴肝膽傾有酒不飲難為情
有酒不飲難為情杜宇苦向春山鳴

和楊孟載對花五詠

種花以娛情而必去惡草草惡人所憎不似花枝好莫
教花易飛花飛迫人老歲晏孰華予行樂宜及早

右種花

春風方袞袞春雨亦疎疎江南二三月好花無處無看
花不知疲飲酒須百壺明朝酒重載紅雨落紛敷

右看花

灼灼樹上花枝枝可攀折折以贈所思亦復自怡悅今

日顏色好明日風光別年年送清明一樹東闌雪

右折花

萬井夜雨歇一枕春日紅開簾買花看恰與去年同花

枝固須好人生自飄蓬未信賣珠兒不作白髮翁

右買花

見花心目舒惜花懷抱惡日日池上行片片風前落盈

盈一春愁脈脈無處托殘紅抱餘香遺恨芳洲泊

右惜花

澄江詩社賦得斬白蛇劍

芙蓉秋水湛青萍曾伴高皇起沛亭蛇斷恍聞神嫗泣

人傳疑帶鮑魚腥山河帝業憑三尺雷電龍光護百靈
却笑豐城深瘞土精英空射斗牛星

大雨

海上雷驅雨人間陸可舟羣龍低在野雙燕急歸樓楚
甸連天暗吳門六月秋咎徵誰任責珍重廟堂憂

秋懷

半年旅邸愁聽雨七夕樓頭偶見星竹樹蒼蒼思故國
江山歷歷話新亭誰家素練敲明月獨我絺衣步廣庭

住向錦城心未樂自緣垂老感飄零

答大方匡禪老

吟得詩成寫貝多維摩問訊意如何貪看案上傳燈錄
不管門前奏凱歌寸寸娑羅低作樹累累宰堵亂成波
黃花翠竹西風外杖屨無嫌屢見過

擣衣

為擣清砧素令人念橐砧近寒將鴈至入夜正蛩吟霜
月三更杵關山萬里心金風何太弱不與送餘音

答秦仲感秋

關市樓居小似車讀書聲怕惱鄰家自憐不及雙鷗鳥
占斷溪南十畝沙

賓鴻吟

鴻鴈來天雨霜鴻鴈去春日陽鴈來鴈去如嘉賓寒寒
暑暑愁殺人一聲叫落秋空雲不覺淚下霑衣巾如賓
又復如兄弟吁嗟人兮不如彼

張仲簡云此數句勝
作大篇關係世教

送徐仲盟還松江

十年不見南州士
吳下相逢涕泗橫
鬢髮蒼蒼俱老大
襟懷耿耿尚崢嶸
年來江上魚無味
夜半雲間鶴有聲
明日扁舟入空闊
岸花汀草不勝情

白苧詞送孟季成崇明同知

歌吳歌舞吳舞吳兒
蹋浪鳴雙櫓
春風袞袞送行舟
新除使君衣
白苧君衣一何素
娟娟照青年
飄搖舉長袖
亦足相迴旋
白衣之白白於鷺
看時莫使緇塵汙

白頭母次徐孟岳韻

白頭母結縞亦嘗作新婦
鷄皮鮐背行龍鍾數挽青
裘不掩股自從夫壻死軍
中夜夜西風吹獨樹問之
言是餘杭民義兵當年起
閭伍生子誰如孫仲謀憂
國誰如祭征虜白頭母自
傷還自語情知有生不如
無人間何似黃泉路記妾
當年出嫁時人言李下元
無蹊只今餅沈寶釵折縱
守貞心何足埒醜非鳩盤
茶妒悍裴談家妍非張麗
華解唱後庭花豈學乳媪
嫁竇老竟使世人呼阿奢
白頭終當死邨塢有足何
曾入城府近聞金雞

夜半啼天子肆赦平淮西白頭母命在絲忽得見太平
無此骨東家瑩篴急於雨西家銀箏移鴈柱請君彈作
白頭吟莫放哀聲入雲去

和姜將儀寒食韻

倦拈重碧擘輕紅困坐江城似酒中送却春光三月雨
吹來花信幾番風人離桑梓艱難遍淚灑楸梧感慨同
浩蕩煙波千萬頃苦愁無地著溪翁

酬秦仲納涼三絕

庭樹團團散夕陰
浴蘭步屣懶冠襟
殘蟬猶戀餘曛好
故故長繅獨繭琴


空庭坐待月華生
蓮葉吹香到骨清
誰把銀箏彈別院
聽來多是斷腸聲

池上尋詩繞百迴
何須東閣對官梅
靜中賞識人知少
一箇山螢度水來

元詩選初集卷四十八

謹案第三十六頁前三行沙布迪音舊作沙孛丁
今改





總校官候補中書 臣 吳紹濬

校對官編修 臣 范 衷

謄錄貢生 臣 張誠智

欽定四庫全書薈要

集部

元詩選初集卷四十九

詳校官候選知縣臣吳甸華



欽定四庫全書薈要卷二萬四百九

集部

元詩選初集卷四十九 長洲 顧嗣立 編

台哈布哈顧北集

台哈布哈字兼善巴約特氏初名達普化文宗為
賜今名世居白野山其父塔布台始家台州兼善

年十七江浙鄉試首薦明年至治改元賜右榜進
士第一授集賢修撰累轉監察御史順帝初與修
宋遼金三史擢禮部尚書至正八年方國珍兵起

江浙行省叅政多爾濟巴勒被執上招降狀詔台
哈布哈察實以聞具上招捕之策不報十一年遷浙
東道宣尉使都元帥與左丞博囉特穆爾夾攻國珍
博囉先期至為所執尋遣大司農達實特穆爾招之
國珍偽降台哈布哈請攻之不聽改台州路達嚕
噶齊十二年三月國珍襲之澄江九戰死之年四
十九贈行省平章政事魏國公謚忠介立廟台州
額曰崇節兼善好讀書以文章名善篆隸溫潤道

勁盛稱于時自科舉之興諸部子弟類多感勵奮
發以讀書稽古為事迨至正用兵勲舊重臣與有
封疆之責者往往望風奔潰敗衄遁逃之不暇而
挺然抗節秉志不回乃出于一二科目之士如達
兼善余廷心者其死事為最烈然後知爵祿豢養
之恩不如禮義漸摩之澤也故論詩至元季諸臣
以兼善為首廷心次之亦足見二人之不負科名
矣

衡門有餘樂

衡門有餘樂
初日照屋梁
晨起冠我幘
亦復理我裳
雖無車馬喧
草木日夜長
朝食園中葵
莫擷澗底芳
所願不在飽
頷顙亦何傷

桐花煙為吳國良賦

吳郎骨相非食肉
朝食桐花洞庭曲
洞庭三月桐始花
千枝萬朶搖江綠
吳郎采采盈頃筐
寶之不啻瓊膏粟
真珠龍腦吹香霧
夜夜山房擣玄玉
墨成誰共進蓬萊

天顏一笑金門開，河伯香飛噴木葉。
太守噓氣成樓臺，龍賓十二吾何有。
不意龍文入吾手，芙蓉粉暖玻璃匣。
雲藍色映彤墀柳，玉堂退食春晝長。
桃花紙透冰油光，筠管時時濡秀石。
銀鈎歷歷凝玄霜，君不聞易水仙人號。
竒絕落紙三年光，不減又不聞元香。
太守烏玉玦，坡老當年書梯葉。
惜哉唐李不復見，吳郎善保千金訣。
烏手吳郎善保千金訣。

衛將軍玉印歌

武皇雄略吞八荒將軍分道出朔方甘泉論功誰第一
將軍金印照白日尚方寶玉將作匠別刻姓名示殊賞
蟠螭交紐古篆文太常鍾鼎旌奇勲君不見祈連山下
戰骨深中原父老淚滿襟衛后廢殂太子死茂陵落日
秋風起天荒地老故物存摩挲斷文弔英魂

送友還家

君向天台去煩君過我廬可于山下問只在水邊居門
外梅應老窗前竹已疎寄聲諸弟姪老健莫愁予

賦得上林鶯送張兵曹二首

春陰苑樹合日出見黃鸝圓聲度繁葉流羽拂高枝時
節苦易換況經多別離君子貴求友勿懷幽谷悲

春日陽關道鶯聲滿上林來從金谷曉飛度玉樓陰柳
嫩難分色歌停稍辨音明朝空解語人去落花深

此首見雲

林子集

陪幸西湖

北都冠蓋地西郭水雲鄉珠樹三花放鸞旗五色翔雞

翹輝鳳渚豹尾殿龍驤駕擁千官仗帆開百尺檣屬車
陪後乘清道肅前行河漢元通海湖山遠勝杭經綸屬
姚宋制作從班揚瑞繞金根動聲搖玉珮鏘春陰飛土
雨曉露挹天漿御柳枝枝綠仙葩處處香葵傾惟日向
荷偃借風張寶馬鳴沙路華舟迴石塘金吾分禁籞武
衛四屯箱小大濡深澤仁明發正陽皇皇星斗潤落落
股肱良朝野崇無逸邦家重有光賜租寬下國傳詔出
中堂布政親巡省觀民或怠荒麥禾連野迴桑柘出林

長樂歲天顏喜回鑒月下廊

春日次宋顯夫韻

帝城三月多春色南陌風光畫不如躑躅花深啼杜宇

鷓鴣灘漲

一作暖

聚王餘玉樓侶是秦宮宅金水元非鄭

國渠處處笙歌移白日揚雄空讀五車書

上尊號聽詔李供奉以病不出奉寄

丹鳳銜書出內庭羽林環衛擁霓旌千官拜舞開仙仗
四海謳歌荷聖情香霧細添宮柳碧日華遙射錦袍明

侍臣亦有文園病臥聽龍墀鼓吹聲

送趙伯常淮西憲副

東華晨霧正霏霏使者分符向合肥
封事尚留青瑣闥
蒙恩近出紫宸闈
江涵曉日明樓櫓
風引春雲上繡衣
珍重故人千里別
綠尊須盡莫相違

寄姚子中

懶趨青瑣備朝班
焚却銀魚挂鐵冠
琪樹有枝空集燕
竹花無實謾棲鸞
漢廷將相思王允
晉代衣冠託謝安

聖世只今多雨露上林芳草似琅玕

春日宣則門書事簡虞邵菴

三月龍池柳色深碧梧煙暖日愔愔蜂黏落絮縈青幔
燕逐飛花避綠沈仙仗曉開班玉筍雲韶春奏錫瓊林
從臣盡獻河東賦獨有相如得賜金

寄同年宋吏部

金鏡承恩對紫微錦韉白馬耀春暉謾隨仙仗朝天去
不記宮花歷帽歸海國風高秋氣早關河雲冷鴈聲稀

嗟予已屬明時棄自整絲綸

一作綸竿

覓釣磯

與蕭存道元帥作秋千詞分韻得香字

芙蓉宮額半塗黃雙送秋千出畫牆
簾底燕驚花雨亂樹頭蜂繞襪塵香
巧將新月添眉黛閒倩東風響佩璫
歸去綠窗和困睡暫憑春夢到遼陽

送瓊州萬戶入京

海氣昏昏接蜃樓颶風吹浪蹴天浮
旌旗畫卷蕉花落弓劍朝縣瘴雨收
曾把烏號悲絕域却乘赤撥上神州

男兒墜地四方志須及生封萬戶侯

絕句二首

繡簾鉤月夜生涼花霧霏霏

一作陰陰

入畫堂吹徹玉簫人

未寢更添新火試沈香

金吾列侍擁旌旄五色雲深雉尾高視草詞臣方退食

內官傳敕賜櫻桃

一作蒲萄

題祁真人異香卷

帝閣芙蓉罨畫山天香飄渺碧雲間夜深放鶴三花樹

自把黃庭月下看

送劉提舉還江南

帝城三月花亂開
落紅流水如天台
人間風日不可住
劉郎去後應重來

送新進士還蜀

金絡絲韁白鼻騮
錦衣烏帽小宮花
臨邛市上人爭看
不是當年賣酒家

送王奏差調福州

春水溶溶滿鑑湖
蘭舟長護錦屠蘇
可憐走馬閩山道
榕葉陰中聽鷓鴣

題梅竹雙清圖

冰魂無夢到瑤階
翠袖雲鬟並玉釵
青鳥莫銜紅綬帶
夜深重認合歡髹

題柯敬仲竹二首

堤柳拂煙疎翠葉
池蓮過雨落紅衣
娟娟唯有窗前竹
長是清陰伴夕暉

梁王宅裏參差見山簡池邊爛漫栽記得九霄秋月上
滿庭清影覆蒼苔

達兼善為台州守有所廉察因夜宿村家聞鄰婦有
姊妹夜績者姊曰夜寒如此我有瓶酒在牀下汝可
分其清者留以奉姑下濁者吾與爾飲之姒如其言
起而注清者于他器且曰此達元帥也吾等不得嘗
矣姊曰到底清邪遂笑而罷兼善聞
之未曙即去其清節為時所稱若此

余闕青陽集

闕字廷心一字天心唐古氏世居武威父官合肥
徙家焉少孤授徒以養母與吳草廬弟子張恆遊
登元統癸酉進士第二名除同知泗州歷任監察
御史翰林待制至正十三年江淮用兵改淮東宣
慰司為都元帥府治淮西起闕為副使僉都元帥
事分兵守安慶屢敗諸寇拜淮南行省左丞陳友
諒合兵來攻十八年正月城陷闕死之舉家赴井

官民將士從死者以千計事聞贈淮南江北等處行
中書省平章政事追封幽國公謚忠宣廷心留意經
術為文有氣魄能達其所欲言詩體尚江左高視鮑
謝徐庾以下不論也篆隸亦古雅可傳嘗讀書青陽
山中學者稱青陽先生門人郭奎掇拾其遺文為青
陽集六卷同年進士李祁序之謂廷心以羸卒數千
守孤城屹然為江淮保障者五六年援絕城陷與妻
子偕死孤忠大節照映千古為斯文之光明太祖嘉

闕之忠立廟忠節坊命有司歲時致祭

按忠宣公夫人宋太

史傳作伊伯氏張美和元史節要作耶律氏賈良伯死節記作夫人蔣氏公姪孫宗烈云叔祖有妾耶律伊伯氏叔祖母實蔣氏子德臣女安安皆其所生也維揚張毅所記如此

白馬誰家子

白馬誰家子綠轡縵胡纓腰間雙寶劍璀璨雪花明甫
出金華省還過五鳳城君王賜顏色七寶奉威聲夜入
瓊樓飲金尊滿繡楹燕姬陳屢舞楚女奏鳴箏慷慨顧
賓從英風四座生一朝富貴盡不如秋草榮黔婁固貧

賤千載有餘名

送劉伯溫之江西廉使得雲字

祖帳依山館車蓋何繽紛使君驅駟馬衣上繡成文中
坐陳綺席羽觴流薄薰情多酒行急急促歌吹殷況我
同鄉友同館復離羣初暘麗神臯遥望澄遠氛迴鑣望
雙闕五色若卿雲蒼茫歲年徂東西歧路分道長會日
遠何以奉殷勤惟有凌霜柏天寒可贈君

送晉原理之南臺御史兼簡察士安

霜署起南天，雲霄畫榜懸。
兩幃猶可對，二妙古難全。
夏木籠彫檻，風華度繡筵。
時應聯騎出，誰謂非神仙。

秋興亭

涉江登危榭，引望二川流。
雙城共臨水，兩岸起飛樓。
漢渚深初綠，江皋迴易秋。
金風揚素浪，丹霞麗綵舟。
登高及佳日，能賦命良儔。
御者奉旨酒，庖人供膳羞。
一為山水媚，能令車騎留。
為語同懷者，有暇即來遊。

呂公亭

鄂渚江漢會茲亭宅其幽我來窺石鏡兼得眺芳洲遠
岫雲中沒春江雨外流何如乘白鶴吹笛過南樓

先天觀

仙客鍊金地蒼山深幾重至今龍虎氣猶在琵琶峰峰
前石路整金澗垂楊嶺萬壑闕阿宮千年奉丹鼎日日
采三秀人人吹玉笙既要王子晉復命董雙成方朔金
門步春來多自豫青鳥幾時還銜書寄君去北闕懷美
祿南山思遠遊勞心如御水東去復西流

別樊時中

桃花灼灼柳絲柔
立馬看君發鄂州
懊惱人生是離別
不如江漢共東流

山亭會琴圖

連山環絕壑
雲木亂紛披
中有抱琴者
有如榮啟期
蕭然久不去
問子欲何為

元興寺二首

絕塵軒

網軒開翠嶠山水下蔥籠江中寶牀擁樹杪畫欄紅心
融二陣滅境靜六塵空應似青蓮葉齊開綠水中

壓雪軒

軒轅鑄鼎處仙臺成畫圖寒雲生洞渚暝色入蒼梧如
霧飄丹閣非煙起玉鑪年年漫來此無處挽龍胡

竹嶼

秋水鏡臺隍孤洲入淼茫地如方丈好山接會稽長紫
蔓林中合紅蓮葉底香何人酒船裏似是賀知章

送危應奉分院上京

峽路傳清警，金輿夾綵旃。
還如向姑射，詎比幸甘泉。
苑樹紛成幄，關榆始委錢。
從臣偏寵近，載筆慢城邊。

龍丘萇吟贈程子正

戰龍起新室，羣鳥亦翩翩。
偉哉龍丘生，抱琴歸故山。
仰視天際鴻，俯弄席上絃。
清音發疏越，逸響遺澗泉。
悠悠鳳翔漢，婉婉虬媚川。
清風自千古，何用能草玄。

送胥式南還

孟冬寒律應原野降繁霜客子倦遊覽結筇還故鄉驅
車出城闕旭日懸晶光綺宮上爛爛翠閣後蒼蒼豈無
涼華志晞景發清揚富貴在榮遇貧賤有安行恒恐歲
年迫皋蘭凋紫芳君看沙上鴈騫翮乃隨陽

題合魯易之四明山水圖

窗中望蒼翠春木起晨霏孤嶂纔盈尺長松未合圍蕭
蕭此仙客日日候巖扉念爾空延佇王孫且未歸

題劉氏聽雪樓

羣峰擁臨檻脩竹鬱菁菁蔭向曲池好聲惟雪夜清天
寒三日卧人道是袁生

送王其用隨州省親

都門楊柳萬絲垂城下行人駟牡駢宮中近得三年謁
篋裏新裁五色衣漢皋秋晚遊娼少夢渚波寒獵火微
我有愁心似征鴈隨君日日向南飛

題合魯易之鄞江送別圖

欲去更還顧依依戀所知今朝去京日似子渡江時

馬伯庸中丞哀詩

結纓趨魏闕俯仰二十霜化運易遷逝故老今盡亡維
時遊公門時節會高堂崢嶸奉餘論炫燿晞報章制若
縟繡陳聲若寶瑟張儀若龍文鼎煜若照夜璫芋眠出
工巧幻妙極豪芒抽思究皇術振藻詠時康是時朝廷
上才彥侯有望公如逸虬出萬驥為留行念此今已矣
松柏杳茫茫驅車入珂里穹門委舊衡珠移青淵涸桃
盡故蹊荒龍火出勁秋玉衡變春陽朝榮計已殞夕香

豈不芳感彼推輪始惻惻我心傷

題紅梅翠竹圖

竹葉梅花一色春
盈盈翠袖掩丹脣
休言畫史無情思
却勝宮中翦綵人

賦得慈恩寺塔送李惟中赴西臺侍御

祇園開塔廟遐瞰盡三秦
琬玉裁文陛金銅結綺輪
高標雙闕外流影灞陵津
攬轡還登眺題名繼昔人

蘭亭

奉節過東鄙總轡臨越墟覽此崇山阿亭樹猶晉餘陽
林積珍木禊館疏鑿渠微風旋輕瀨宛委寫成書秋杪
霜露滋清商滿縣隅紅蓮凋綺葉微瀾見躍魚藉芳泛
羽觴耽聽良有娛逍遙大化內豈必三月初

贈澄上人

壞色衣裳護七條手持經卷意蕭蕭頭陀寺裏相逢後
又向天台訪石橋

贈山中道士善琴

山中道士綠荷衣
新抱瑤琴出翠微
已與塵緣斷來往
逢人猶鼓雉朝飛

安慶郡庠後亭讌董僉事

亭名天
開圖畫

鯨鯢起襄漢
郡邑盡燒殘
茲城獨完好
使者一開顏
省風降文囿
弭節遵曲干
雙池夾行徑
累榭在雲間
天淨羣峰出
地迴蒼江環
霞生射蛟臺
鴈沒逢龍山
開罇華堂上
命酌頰危闌
主人送瑤爵
但云嘉會難
豈為杯酒讌
樂此罷民安
魄淵無恒彩
清川有急瀾
明晨起驂服
相望阻重關

九日宴盛唐門

今日良宴集玉帳設金縣賓稱此嘉辰令德應重乾淒淒
秋陽升湛湛江景鮮西馳三溼津東瞻九華山文湍帶粉
堞鄉雲覆綵旃清歌送銀爵泛此秋花妍嗟予遠征人別
家今四年采薇夜歸戍操築朝治垣微此一日歡苦辛良
可憐中觴感前謫撫運當泰年燔柴盛唐郡泛舟樅江前
臨川射長蛟雄風推八埏豎儒繆從役任重力廼綿武功
既無成文德何由宣微勲儻有濟敢媿魯仲連

登太平寺次韻董憲副

蕭寺行春望下方城中雲物變淒涼野人籬落通瀾口
賈客帆檣出漢陽多難漸平堪對酒一尊未盡更焚香
憑將使者陽春曲消盡征人鬢上霜

題溪樓

溪水綠悠悠高樓在溪上日莫望江南舟中采菱唱

送康上人往三城

嘗登大龍嶺橫梁視四方原野何蕭條白骨紛交橫維

昔休明日茲城冠荆揚芳郊列華屋文纓被五章乘車
衣螭繡貴擬金與張此禍誰所為念之五內傷豎儒謬
乘障永賴天降康樅陽將解甲皖邑寢開疆耕夫緣南
畝士女各在桑念子中林士振策亦有行我聞三城美
龍嶺在其傍連林積修阻下有澄湖光明當洗甲兵從
子臥石牀

七哀

殷武誦窳阻周魯歌東征聖哲則有然我何敢留行斬

牲祀好時釁鼓起前旌野布魚麗陣山鳴鐃吹聲函關
何用塞受降行已城路逢故鄉人取書寄東京寄言東
京友勉樹千載名一身未足惜妻子非無情

葛編脩輓歌

景光

昔別情何樂今還語向誰幽房通貝闕空館罨蕪絲未
過徐公墓徒懷有道碑扁舟望湖曲清淚溼江蘼

賦得鉅野澤送宋顯夫僉事之南山

隄上柳沈沈春蒲泛渚禽濟田東匯闊汶水北流深落

日依中沚浮雲積太陰微茫看不盡渾似別時心

送張有恒赴安慶郡經歷

曉路通高嶂春城入大江草生垂釣浦人語讀書窗
肅客移茶鼎行田載酒缸幕寮誰得似高步絕紛龐

送李伯實下第還江西

之子不得意南行無怨辭官河人杳杳客路雨絲絲
古木淮陰市春城孺子祠悽然千里別為賦小星詩

雲松樓

初日高樓上卷幔對黃山黃山出霄漢爛漫發青蓮
參差非一狀朝夕看屢妍九華承雙舄敬亭附駢筵
漫漫雲羃嶺沈沈松覆泉清飈坐中起如聞帝女絃
靜有幽事樂動無塵慮牽消搖悅心目茲道可長年

揚平章崇德樓

重城控秋塞丹樓耀芳甸頽霞上氛氲蒼林下蔥蒨
長河城邊急積沮窗中見遠鴈滅居延行雲歸鄯善
大賢謝卿相垂幃化鄉縣春蟲觸寶瑟餘花飄玉研
方從董

園樂陋彼歌梁轉伊予去山澤寒齋秋草徧載覽登樓
篇益重臨淵美

長安陌

浩浩長安陌瓊樓夾廣廈鴛鴦御溝上芍藥吹樓前駿
馬追韓嫣金尊約鄭虔功名有時有且得樂當年

賦得君子泉送彭公權為黃州教

君子沒已久遺井郡齋中本寓思人意兼全澤物功銀
牀駁故蘚玉甃落寒桐幾日趨官舍橫經誦養蒙

賦得春鴈送司執中江西憲幕

春風起蘋末，旅鴈尚回翔。
乳鴨嬌同唳，新蒲短可藏。
應懷洞庭水，非避塞垣霜。
客路頻懷舊，題詩寄帝鄉。

賦得蛾眉亭送王德常御史赴南臺

江亭望華嶠，望望似修眉。
掃黛偏能巧，含顰知為誰。
娟娟微雨裏，脉脉夕陽時。
千里乘驄去，因之傷別離。

南歸偶書二首

帝城南下望江城，此去鄉關半月程。
同向春風折楊柳，

一般離別兩般情

二月不歸三月歸已將行篋捲征衣殷勤未報家園樹
緩緩開花緩緩飛

別樊時中廉使

光祿橋西惜解攜春星欲傍露盤低自來官柳多離思
更著城烏在上啼

飲散荅盧使君

契闊思相見留連及此辰長江映酒色細雨若歌塵所

喜襟懷共由來態度真何時洗兵馬得與孟家鄰

賦得琵琶峰送人降香龍虎山

瓊峰毓奇態高高出先天柄超琳闕迴盤影淥池圓別
闕標蒼樾回窗蓄紫煙淙流如度曲藤蔓似長絃肖像

生儀始希顏太古前雖無羅袖拂常暎礪花妍子有靈
侯技能彈大道篇函香一臨眺天際意飄然

可惜吟

春風吹人上妝樓樓頭畫眉望池州平生倚君似山海

十年不見胡不愁東家買紅聘小女西家迎鸞夜擊鼓
眼看拾翠同年人今又堂堂作人母良人良人固家貧
妾身待君亦苦辛只愁明鏡生白髮有錢難買而今春
此心懸知燕堪託裁書繫渠左邊脚願將妾言入其幕
纈紋資裝亦不惡

雨中過長沙湖

細雨灑秋色平湖生白波客心貪路急帆腹受風多落
木生秋思驚禽避棹歌舟行不惜酒兀坐奈愁何

揚州客舍

船頭澆酒祀神龍
手擲金錢撒水中
百尺樓船雙夾櫓
唱歌齊上呂梁洪

李白玩月圖

春池細雨柳纖纖
手倦揮毫日上簾
想得停杯江海夜
月明照見水晶鹽

王翰友石山人遺藁

翰字用文靈武人先世本齊人沒於西夏元初賜
姓唐古氏從下江淮以領兵千戶鎮廬州家焉翰
初名諾摩罕年十六領所部有能名省府交薦除
廬州路治中改福州路尋以同知升理問官綜理
永福羅源二縣擢江西福建行省郎中平章陳有
定據守全閩留居幕府敬且憚之表授潮州路總
管兼督循梅惠三州陳氏敗浮海抵交占界不果

屏居永福之觀獵山自號友石山人簪冠卉服葛屨繩帶與樵童牧豎田夫漁父雜處如是者十年辟書再至歎曰女豈可更適人哉時長子偁纔九歲屬其友人吳海且賦詩見志云昔在潮陽我欲死宗嗣如絲我無子彼時我死作忠臣覆祀絕宗良可恥今年辟書親到門丁男屋下三人存寸刃在手顧不惜一死却了君親恩遂自引決年四十六時明洪武戊午之二月也用文將家子有古烈

士風晚年隱忍林壑尤以詩自娛廬陵陳仲述謂
皆心聲之應而非苟然炫葩組華者比遺藁即其
子偁所掇拾偁永樂中為檢討以能詩名

送別劉子中

執手寒江濱慷慨難為別豈無楊柳枝零亂不堪折鴻
鴈西北來嗷嗷唳晴雪陽和忽已暮旅況轉淒切誰憐
蘇子卿天涯持漢節

途中

萬物皆有托我生獨無家蔓草野多露眇眇天之涯親
戚不在旁更與奴僕賒落日下長坂悲風卷驚沙林依
避猛虎郊行畏長蛇封狐逐野鼠跳踉當吾車村墟四
五聚索莫集昏鴉方投異鄉跡又悲遠城笳撫劍向夜
起中心鬱如麻微軀焉足惜天道良可嗟雲漢念乖阻
道路日已遐去去復何極為君惜年華

題菊

我憶故園時繞籬種佳菊交葉長青蔥餘英吐芳馥別

來二十載粲粲抱幽獨
豈無桃李顏歲晚同草木
及茲覩餘芳使我淚盈掬
離披已欲摧瀟洒猶在目
雨露豈所偏歲月不可復
歸去來南山食英坐空谷

和鄉友程氏民同會龍山留別韻

相思樂未終憂心亦何苦
翩翹驚鶴羣牢落麋鹿伍
緬懷駕輅車伊昔事戎府
王事多險艱跋涉幾風雨
看劒思躍龍登墉氣摧虎
奈何向中道山川竟修阻
及茲展良覲澄秋碧江潁
雲山寄徜徉煙蘿暫容與
相投既不

厭感慨獨懷古長風起疎林寒色落芳渚廣筵促鳴鷗
泠然奏飛雨雲霄浩無涯去去但凝佇

龍山月夜飲酒分韻得樹字

薄莫清興嘉涼風集高樹須臾明月生清光在尊俎池
空河影涼石冷苔色古列坐當前墀杯行不煩舉野庖
具山蔬稚子薦鷄黍晴峰餘靄收密竹殘露滑驚鵲翻
夜巢流螢墮前戶良時念睽離觸物感所寓坐待河影
流疎鐘繞林曙

秋懷

懸門扶桑弧丈夫四方績奈何中險艱零落苦相失涼
風天際來庭草淒以碧嗷嗷雙飛鴻宵征度寥闕物性
既如此予茲念何適寒聲在衣中心煩百憂集美人隔
天涯佳期阻良夕鼎湖詎可招巫咸已難即孤憤不自
聊長歌振巖石

挽迭漳州

黑雲壓城天柱折長烽夜照孤臣節劒血飛丹氣奪虹

銀章觸手紛如雪
丈夫顧義不顧死
泰華可摧川可竭
焦黃荔丹酒滿壺
千載漳人酹鳴咽

挽柏僉院

柏君挺挺英雄姿
出佐薇省丁時危
愁聞兩浙已瓦解
江南民命猶懸絲
樓船一旦下江水
殺氣兵氛壓城壘
大臣夙駕思棄城
戰士魂銷將心死
臣雖力困肝膽存
臣當殺身思報恩
誓將一木支頽厦
有豎降幟登轅門
人生恩愛豈不顧
詎忍貪生負天子
半空煙漲樓宇紅

盡室魂飛劍光紫嗚呼氣分光岳臣道衰賣降授節紛
陸離巍巍廊廟已如此扶持世教非公誰扶持世教非
公誰

送陳同僉

馬首出城東將軍膽氣雄旌旗明苦日笳鼓動悲風早
雪三邊恨寧誇百戰功相期春草色處處凱歌同

山居春暮偶成

水氣掩蒼扉蘿香織翠微洞迴雲到少地僻客來稀野

鳥傷春去楊花作雪飛祇因飄泊久對此也沾衣

故人遂初過山居

秋氣誰相問荒居懶閉門
劒歌雙鬢換國步寸心存
漫寫當年事偏驚此日魂
風流非舊日有蟲對誰捫

夜宿洪塘舟中次劉子中韻

勝地標孤塔遙津集百船
岸迴孤嶼火風度隔村煙
樹色迷芳渚漁歌起暮天
客愁無處寫相對未成眠

題畫小景

萬籟秋聲近雙峰宿靄收江涵林影碎野接曙光浮蘿
薜連書幌鶯花避釣舟由來揚子宅寂莫閉丹丘

遊鼓山靈源洞時澄明景霽入望千里徘徊自
旦至夕值月上聞梵聲泠然有出塵之想

旭日照高岑天風振遠林不應滄海色那識白雲心寶
樹空香滿珠林積翠深坐來明月上何處起潮音

晚眺次林公偉韻

偶信東山屐尋幽到翠微白雲空野樹紅葉戀斜暉岸

落潮初滿天寒鴈未歸風塵江海徧不上野人衣

聞大軍渡淮

挾策南遊已十年夢魂幾度拜幽燕王師近報清淮甸
羽檄當今到海壖妖氣蒼茫空獨恨生民憔悴竟誰憐
廟堂早定匡時策我亦歸耕粟里田

夜雨

官舍人稀夜雨初疎燈相對竟何如乾坤迢遞干戈滿
煙火蕭條里社虛報國每慚孫武策匡時空草賈生書

手持漢節歸何日北望神京萬里餘

過化劍津有感

寶劍沈沙世已傾千年波浪未能平
空餘故壘鄰滄島
那復雄兵出郡城
淮上何人祠許遠
海中無客葬田橫
夜深有氣干牛斗
洒淚空含萬古情

寄別劉子中

問君西去與誰親
吳楚山川滿目新
賈傳有才終大用
杜陵無計豈長貧
鳳凰臺古思明月
采石江空夢白蘋

幾欲西風斟別酒不堪零露滿衣巾

遊鴈湖二首

在觀獵山之巔
羣鴈所栖集也

鴈去湖空野水深秋風吹客上遙岑
丹楓盡逐孤臣淚黃菊空憐處士心
雨後諸峯浮夕靄霜前一葉送寒陰
停車欲問當年事尺素何由到上林

江海風波浩不收却來此地駐清遊
上方樓閣通三島別墅煙霞卜一丘
書斷鴈歸沙塞遠丹成龍去鼎湖秋
悠悠此意憑誰問陳迹空餘萬古愁

和馬子英見寄韻

十年流落向炎州判與劉伶作醉遊
望國孤忠徒自憤持身直道更何求
浮雲往事驚春夢落日窮途起暮愁
賴有故人相憶在徧題尺牘海西頭

春日雨中即事

京洛繁華事已違懷人竟日掩空扉
望迷楚岫聞啼鵲思入秦川怨落暉
野館蕭條芳草合寒江寂寞暮雲飛
落花片片隨流水惆悵關河淚滿衣

立春日有感

故國棲遲去路難園林此日又冬殘
天涯往事書難寄客裏新愁淚未乾
臘雪漸隨芳草變東風猶笑布袍單
堤邊楊柳開青眼有傍梅花共歲寒

晚宿楊隄舟中懷魯客

螢度星依草鷗來霜滿汀
故人不可見天際亂山青

題畫葵花

上苑餘春輦路荒芳菲落盡更堪傷
憐渠自是無情物

猶解傾心向太陽

題敗荷

曾向西湖載酒歸
香風十里弄晴暉
芳菲今日凋零盡
却送秋聲到客衣

--	--	--	--	--	--	--	--

鄭玉師山集

玉字子美徽州歙縣人敏悟嗜學門人受業者所
居至不能容構師山書院以處焉為文章不事雕
刻亟稱於虞揭歐陽諸公至正十四年除翰林待
制遣使者賜以上尊名幣浮海徵之辭疾不起十
七年明太祖下徽州守將要之使出玉曰吾豈仕
二姓者耶北向再拜自經死嘗作詩云何時四海
收兵甲還向師山理舊書學者稱師山先生所著

有師山集同郡程以文稱其制行高見道明故卓
然能自為一家言如此

題洪氏舫軒

山人愛舟屋亦舟山中便作滄海游何須風帆冒險遠
東西南北窮遐馭向來此是荊棘地今日遂作江湖秋
門前嵐霧靄蒼翠渾疑江上煙波浮雲旋日動屋移影
舟行岸轉曲江頭主人自是濟川手坐令涉險如安流
復有佳客天下士作記寫出清絕幽王先生詩繼二雅

五字萬里爭追求徐公翰墨妙當世夜深光彩射斗牛
世間尤物自足貴安用航海珠玉謀誰當共此樂朝夕
窗外忘機兩白鷗

黔坑橋亭次以文韻二首

擢筆題高柱披襟挹好風剖瓜蘇渴客採藥識仙翁飛
鳥連雲白幽花點水紅相從問歸路疑悞入崆峒

結屋依山麓衣冠尚古風醉人千日酒扶杖百年翁雲
起山松綠風迴野燒紅誰云避世者猶自在崆峒

病中寄兄弟

苦熱已無計那堪與病俱過從無好客遣興有新書世
事炎涼態人生骨肉軀何當寄伯仲相與問何如

題天目山

勢壓東南萬象低溟濛空翠望中迷龍飛鳳舞川原秀
地下天高日月齊武肅百年鍾霸氣文忠千古欠留題
客來欲問青雲路鑿破峻嶒便作梯

婺源胡氏屏山樓

樓外青山列翠屏，矮窗放入眼增明。
丹青花草春描畫，水墨林泉秋寫成。
變化四時無俗韻，登臨千古有餘清。
高人對此不容語，獨倚闌干看晚晴。

白嶽

名冠江南第一山，乾坤故設石門關。
重重煙樹微茫裏，簇簇峯巒縹緲間。
五夜松聲驚鶴夢，半龕燈影伴人閒。
忽聞環珮珊珊度，知是神仙月下還。

師山書樓成唐長孺先生賦詩見寄次韻

居山日夕見山容環堵蕭然一畝宮我喜煙雲來几上人看樓閣出空中夜深月色偏明朗曉起嵐光更鬱蔥若比羊裘軒上景臨江惟欠一絲風

次韻述懷

家住江南黃葉邨繩樞瓮牖席為門自罹盜賊人傳死重見交游我幸存焦土更無遺簡策供厨惟有舊匏尊黃巾迎拜何為者自媿疎庸不足論

八月十四夜玩月岑山次鮑伯原韻

夜深雲散碧天開
月影沈沈入酒杯
風露半天成顚氣
干戈滿目起塵埃
分明滄海浮雙島
隱約巖灘見兩臺
今日有懷須盡興
明朝無雨約重來

游覆船山宿草堂

眠雲石上屋三間
瀑布當檐坐卧看
怪底巖前龍忽起
夜來風雨不勝寒

登師山諸生有書二首

城上鐘聲度遠溪
扶桑破曙海雲低
披衣欲起還欹枕

山下晨雞四面啼

山前邨落亂高低
雲意模糊遠近迷
萬疊峰巒如畫展
黃山正在小樓西

覆船山樵歌錄三

家童礪

路入黃茅劒斷蛇
疎籬石礪野人家
山深地冷春難老
五月巖前見落花

響泉

歷盡崎嶇上碧岑高山流水似鳴琴何須水樂尋幽洞
自有巖前太古音

金婆店

常憶當年武肅王金婆店裏月華光山中十月桃應熟
未薦仙人不敢嘗

元宵詩用仲安韻五首

對簇黿山十萬人皇都今夕幾分春六街三市渾如畫
寄語金吾莫夜巡

神前兒女舞妖嬈社下游人弄管簫到處人家說元夕
不知元夕是今宵

賞罷花鐙步月歸自將拄杖扣柴扉回頭形影驚相弔
但覺從前百事非

天下承平近百年歌姬舞女出朝鮮燕山兩度逢元夕
不見都人事管絃

市上鐙張玉井蓮門前簫鼓更喧天先生嬾向兒童語
閉戶高居但欲眠

李初雲陽集

初字一初別號希遠茶陵州人元統元年登李齊榜進士第二其右榜第二人則余闕廷心也授應奉翰林文字母老就養江南除婺源州同知遷江浙儒學副提舉以母憂解職退隱永新山中明初兵至永新一初被傷儒衣冠僵仆道左俞千戶子茂遣人舁歸辟正舍禮之力辭徵辟年七十餘卒子茂為刻其遺藁曰雲陽先生集十卷弘治中大

學士東陽表其墓云族高祖希遽先生當元季之
亂慨然欲效一障以死而不可得又以為委質事
人不可終負蓋見諸王明妃詩及青陽集序自以
不得如廷心為恨也劉學士三吾謂其曾次廓然
為文不事剗剗詩亦如之雖在艱危不忘忠愛其
與李公平余廷心科名相埒宜矣

附記西崖跋劉學士題辭云南

京太僕少卿李公貞伯致政歸蘇得吾鄉先生劉學士題辭謂所載希遽府君事甚備錄以見遺其云策試以南士故失魁表謝代李齊為首及應奉未上過家拜慶既還鄉用薦僉湖南憲道梗不赴

者皆孤陋所未聞若丁內外艱在同知婺源之前
與舊所聞親老就養者異姑附其文以備參考此
婺源汪憲副希顏為子購大字杜詩真蹟四絕乃
為俞統制子所書者府君寓蘇頗久其遺文蓋未
盡見他日猶有可考云弘治癸
丑二月朔諸孫東陽再拜書

題金人出塞圖

穹林立喬松峭壁插平地蒼茫絕飛鳥倏忽見羣騎雜
襲衣與裘蒙茸間氊毳差池鞭弭間孰識誰賤貴憶昔
從北征驅車出幽薊天時大雨雪道遠恐遂泥牛馬俱
阻寒驢騾縮如蝟所見人物殊適與此圖類當時皇風

淳聲教浹遐裔雕題與被髮商賈固不至自從煙塵生
河海隔氛翳舟車斷往來榛莽極荒穢邂逅見此圖俯
仰今昔異矯首欲無言長空正迢遞

同孫彥能遊山菴

緣崖涉清沘披草得幽逕蕭條雙檜間獨立一松勁入
門聽微鐘心垢一時淨向來飽干戈棟宇兀偏正空庭
鳥雀喧壞壁龍虎瞑徒能起咨嗟無復聳觀敬三歎復
出門乾坤幾時定

一鏡亭夜坐

靜夜臨深池蕭條不成寐
蟾光上下浮清颺左右至潛
魚既息波幽鳥亦斂翅仰視河漢明悠然發深喟

斗室為江士瞻賦

移舟向溪渚結屋依山阿
從容漁釣閒樂意何其多天
光入戶牖萬象皆森羅
援琴奏逸響清颺振林柯
亦有素心人酒熟時相過
誰云一室陋福迫無逶迤
所嗟今世士締構高嵯峨
畫棟隔飛鳥朱甍映清波
一朝壽命

盡歎息將奈何日月互顯晦乾坤相盪摩願言處茲室
樂哉聊永歌

藤溪釣叟歌

并序

新安金汝霖才俊之士也薄聲名而慕閒曠從容
山水間遊戲翰墨咸有深趣其自號曰藤溪釣叟
海漚道人李某為之作歌

藤溪釣叟清且奇出處不與旁人知脩然垂釣坐溪上
下上雲月相追隨朝看溪上雲暮踏溪頭月青山綠水

是生涯紅蓼丹楓共蕭瑟有時欲寫蒼龍姿雷轟電掣
風雨馳高堂素壁見揮掃凜凜毛髮寒生肌有時直向
梅花下弄筆搖毫恣描寫新條舊榦總橫斜嫩蘂疎花
亦瀟灑藤溪釣叟非釣徒遯世不見真良謨得魚沽酒
喚溪友顛倒汗漫同懽娛君釣藤溪魚我作藤溪歌風
塵瀕洞豺虎出一笑奈爾藤溪何

昭君出塞圖

朔風吹沙天冥冥愁雲壓塞邊風腥胡兒執麾背人立

傳道單于令行急蒙茸胡帽貂鼠裘誰信宮袍淚痕溼
漢家恩深幸不早此身終向胡中老此身儻負漢宮恩
殺盡青青原上草

奉題朱澤民先生畫山水圖

洞庭之南湘水東青山奕奕蟠蒼龍雲陽峰高七十一
欲與衡岳爭為雄我家近在雲陽下來往看山如看畫
十年塵土走西風每憶雲陽動悲咤吳中勝士朱隱君
筆精墨妙天下聞畫圖畫出湘江水青山上有雲陽雲

雲陽山高湘水綠十年不見勞心目只今看畫似看山
萬里歸情寄鴻鵠

贈王汝賢

瀕洞知誰在倉皇賴汝賢壯心拋舞劍驚膽落虛弦莫
雨滄江上春風綠柳邊高歌聊自遣世事欲茫然

題王與齡畦樂

有客依南浦長年學種畦才高宜世用性僻愛幽棲
菜甲侵腰長桑枝刺眼低不因來往熟那得自成蹊

和王子讓席上韻

衰年愁對酒壯志憶題橋遇事難開口逢人媿折腰樂
傳天上譜心逐莫歸樵宴罷驪歌發蹉跎又一朝

和詠鶴

老去曾看相鶴經暫從華館試伶俜幾年養就丹砂頂
竟日閒梳白雪翎萬里壯心原自許九霄清唳好誰聽
神仙舊侶知何在遙望蓬萊一點青

次王子讓韻二首

老淚縱橫憶舊京夢中歧路欠分明天涯自信甘流落
海內誰堪託死生短策未容還故里片帆只欲駕滄瀛
他年便作芙蓉主慚愧當時石曼卿

城郭人民事事非空餘塵土滿征衣君猶有道堪流俗
我已無家不念歸天地晦冥龍去遠江湖寥落鴈來稀
極知此後還相憶愁見青山映夕暉

次賀琴南韻

茅屋秋風古道傍衰容不似去年強漢廷無夢陳三策

楚水空懷賦九章落日亂鴉紅樹老斷雲孤鴈碧天長
相思無限關心事不為催詩急雨忙

和青原寺長老無詰見寄

毵毵白髮舊儒臣幾見江南物候新問訊枉煩林下士
變衰祇似夢中人隔簾聽雨常經久倚戶看山不厭頻
更欲就依禪榻伴爐煙終日澹綢緼

賀俞總制造新衙

為惜頻年汗馬勞更聞新署列官曹貔貅夜宿轅門靜

鸞鵠晨趨劔佩高月滿麗譙添雉堞雨深山寨長蓬蒿
公餘秀水橋邊路千騎鳴笳擁節旄

送非空晦之二上人歸青原

青原山氣鬱盤紆去郭連邨十里餘洗鉢水香晨粥後
讀書燈燼曉鐘初晴天小閣收摩衲煖日輕雲護芻芻
願得明年筋力健徑尋溪路訪深居

和鍾德恭見寄

江湖風浪日蕭蕭鰕蟹魚鰕亂躑跳諸葛有才終復漢

管寧無計漫依遼煙消故國川原淨秋入空山草木凋
猶恨歸來相見晚暮雲春樹碧天遙

送吳俊傑歸江東

幕下貔貅十萬人幕中賓客罕同倫揮戈略陳天回日
點燭論兵夜向晨禾水衣冠仍草草星源文物故彬彬
知君賸有安邊策定約重來立要津

和劉子倫韻奉吳孟勤

不是衰翁愛索居只緣多病故人疎來依陸氏三間屋

勝得劉公一紙書同輩謾推年齒大後生應笑老成迂
知心賴有通家子早晚相過意迴殊

和友人見寄

碧天如水暮雲收又見江南一片秋亂後年華多荏苒
客中蹤跡故淹留露溥金井桐陰薄月上瑤階竹影修
遙想轅門涼氣早壺漿來往百無憂

御賜恩榮宴

堂吏喧呼擁後先綵簾微動八音宣聖恩汪濊儒臣集

天語丁寧宰相傳翠葉銀幡高壓帽玉盤珍果謾堆筵
沾濡拜舞歸來晚馬上題詩不記鞭

一初廷對策儼甲是科啟械乃南士

遂改次李齊公平會齋病上表謝恩則先生也故鄉人稱李狀元云

和詠海棠韻

名花初發愛輕陰翠袖紅妝新滿林步入錦帷香徑小
醉扶銀燭畫堂深妖饒喜識春風面零落愁闌夜雨心
多幸鳳皇池上客為抽勞思寫清吟

題畫鷹

勁翮排霜戟天寒氣轉驕草間狐兔盡側目望青霄

題風雨圖

山中老子百年餘前代衣冠只自如高閣捲簾無一事
滿天風雨坐看書

題赤鯉圖

風翻雷吼動乾坤赤鯉騰波勢獨尊無數閒鱗齊上下
欲隨春浪過龍門

題雪禽

幽禽棲穩棘枝低黯慘江天雪四圍
明日郊原晴爛漫
好尋芳樹弄毛衣

山居首夏十首示外孫陳祖蘭

錄三

東風滿意綠週遭
乍著單衣脫敝袍
最愛晚涼新浴罷
坐看春筍過林高

前年新覓數株梅
移向庭前手自栽
惆悵近來風土薄
殷勤難得一枝開

山前山後翳蒙茸
荆棘藤梢謾作叢
願得長年撐飽飯

自鉏煙雨種高松

和王子讓二首

萬頃煙波一葉舟更無維楫任飄流此身自合他鄉死
爭奈狂狐憶首丘

我逐郊原鹿豕蹤君如鷹隼挾秋風近聞鐵網連山海
不信人間有卧龍

題畫二絕

浩浩滄波天四圍秋風一鶴夜來歸祇應夢裏聞長笛

知是年時舊羽衣

町畦高下水漫漫痛惜辛勤學種田便擬明朝結長網

與翁同住浙江邊

右絕詩二章茶陵李先生墨迹先生退隱永新山中絕意仕進二絕必其

與同志者否則寓言耳前以鶴歸為況後以耕漁為事其高尚貞一之志確然有不可拔者於是乎槩見矣後

學安成

彭華識

元詩選初集卷四十九

謹案第一頁前五行塔布台舊作塔不台今改


一頁後一行多爾濟巴勒舊作朶兒只班今改

一頁後五行達魯噶齊舊作達魯花赤今改

九頁前二行唐古舊作唐兀今改 十頁前

三行伊伯氏舊作耶卜氏今改 二十三頁前

四行諾摩罕舊作那木罕今改



總校官候補中書臣吳紹潔
校對官編修臣范 衷
謄錄貢生臣張誠智